

خَطِ اوّلِ پوُلُسِ بَلَدِه اِيْمَانْدَارَايِ

تِسَالُونِيكِي

پيشگفتار

امي خطِ بَلَدِه اِيْمَانْدَارَايِ شَارِ تِسَالُونِيكِي نُوْشْتِه شُدِه. تِسَالُونِيكِي پايْتخْتِ وِلايْتِ مَقْدُونِيه بُوْد و مَقْدُونِيه يَكِي از وِلايْتِ هَايِ اَمِپْرَاطُورِي رُوْمِ.

پوُلُسِ وِخْتِيكِه شَارِ فِيلِيپِي رِه اِيْلِه كَدِه دَ تِسَالُونِيكِي رَفْتِ، اُو مَرْدُمِ اَزُوْنجِي رِه دَعُوْتِ كَدِ كِه دَ مَسِيْحِ اِيْمَانِ بِيْرِه و اَزِوَا يِگِ جَمَاعَتِ جُورِ كَدِ، مِگَمِ كَلُو وِخْتِ تِيْرِ نَشُدُ كِه يَهُودِيَا قَدِ اَزُو مُخَالِفَتِ رِه شُرُوعِ كَدِ. اُوْنَا وِخْتِي دِيْدِ كِه كَارِ اِعْلَانِ كَدُوْنِ خُوشخَبْرِي پوُلُسِ دَ مِيْنِكَلِ مَرْدُمَايِ غَيْرِ يَهُودِ دَ كَامِيَايِي پِيْشِ مَوْرِه، قَارِ اَزِوَا بَالِه اَمَدِ و اُوْنَا بَخِيْلِي رِه شُرُوعِ كَدِ، چُونِ كَلُو مَرْدُمَايِ غَيْرِ يَهُودِ پِيْشِ اَزُو دَ يَهُودِيَتِ دِلچَسِپِي دَشْتِ. مُخَالِفَتِ اَزِوَا دَ اَنْدَازِه كَلُو شُدِ كِه پوُلُسِ مَجْبُورِ شُدِ تِسَالُونِيكِي رِه اِيْلِه كَنِه و دَ شَارِ بِيْرِيه بَوْرِه. بَعْدِ اَزِ يِگِ مُدَتِ وِخْتِيكِه پوُلُسِ دَ شَارِ قُرْنَتْسِ رَفْتِ، هَمَكَارِ شِي تِيْمُوْتَاوُسِ بَلَدِه اَزُو دَ بَارِه اِيْمَانْدَارَايِ تِسَالُونِيكِي خَبْرِ رِيْبِي كَدِ. مُطَابِقِ خَبْرِ تِيْمُوْتَاوُسِ، دَ مِيْنِكَلِ اِيْمَانْدَارِي تِسَالُونِيكِي دَ بَارِه پَسِ اَمَدُوْنِ مَسِيْحِ سِوَالِ

پیدا شُد. امزو خاطر پولس لازم ديد که موضوع ره بلده ازوا بيان کُنه.

پولس د امزی خط بلده خبر خوب که د باره ايمان و مُحَبَّت ايماندارای تسالونیکي شنیده، خدا ره شکرگزاری مونه و د یاد ازوا میره که او د مینکل ازوا چی رقم زندگی مُوکد. پولس شوق و علاقه خو ره بلده دوباره دیدون ازوا اظهار مونه و اونا ره نصیحت مونه که زندگی پاک و مقدس داشته بشه. بعد ازو د سوالهای که د باره پس آمدون مسیح و د باره ايماندارای فوت شده د مینکل ازوا پیدا شُد، جواب میدیه و د باره ازی که مسیح چی وخت و چی رقم پس مییه و قد ايماندارای فوت شده د وخت آمدون مسیح چیز کار موشه بلده ازوا بيان مُوکنه.

فهرستِ عنوانها

سلام ها (فصل ۱: آیه ۱)

شکرگزاری و دُعا (۱:۲)

خدمتای پولس د ايماندارای تسالونیکي (۱:۲)

خبر خوش و دلگرم کُننده تیموتائوس (۳:۶)

زندگی مطابقِ خاستِ خدا (۱:۴)

ظهورِ مسیح (۴:۱۳)

تیارای بلده ظهورِ مسیح (۱:۵)

نصیحت های آخري (۵:۱۲)

۱ از طرف پولس، سلوانس و تیموتائوس، تقدیم د جماعت ایماندارای شار تسالونیکي که د آته مو خدا و د مولا عیسیٰ مسیح تعلق درید: فیض و سلامتی نصیب شمو شنه!

شکرگزاری و دعا

۲ مو همیشه خدا ره بلده پگ شمو شکر-و-سپاس موی. د دعای خوهر وخت شمو ره ذکر کده^۳ اعمال پر ایمان، کار پر مهر-و-محبت و امید استوار شمو ره د مولای مو عیسیٰ مسیح، د حضور آته مو خدا یاد مونی. ^۴ آی برارو، مو میدنی که خدا شمو ره دوست دره و شمو ره بلده مقصد خو انتخاب کده، ^۵ چون زمانی که مو خوشخبری ره دز شمو اعلان کدی، تنها لفظی او ره نگفتی، بلکه د قدرت معجزه ها و روح القدس و د یقین-و-اطمینان کامل او ره دز شمو رسندی. شمو دیدید که مو د بین شمو چطور رویه-و-رفتار موکدی و چپس د فکر شمو بودی. ^۶ شمو از مو سرمشق گرفتید و از مولا پیروی کدید و اگرچه از خاطر پیغام خدا رنج کلو دیدید، و له باز ام شمو او ره د خوشی که روح القدس میدیه قبول کدید. ^۷ د مزی رقم شمو بلده پگ ایماندارا د منطقه های مقدونیه و آخیا یگ الگو جور شدید. ^۸ آلی کلام مولا توسط از شمو نه تنها د مقدونیه و د آخیا پخش شده، بلکه توره ها د باره ایمان شمو د خدا، د تمام جای ها د گوش مردم رسیده. پس لازم نییه که مو یگو چیز بگی، ^۹ چراکه مردم امرو جای ها خودون شی شاهدی میدیه که شمو چی رقم قد از مو خوشامد-و-پیشامد کدید و د چی نیت پاک از بت پرستی دست کشیده سون خدای زنده و حقیقی روی آوردید تا دزو خدمت کنید، ^{۱۰} و د چی شوق کلو منتظر ظهور باچه ازو یعنی مولا عیسیٰ، از عالم باله آستید. خدا او ره دوباره زنده کد و او مو ره از غصب آخرت نجات میدیه.

خدمتای پولس د ایماندارای تسالونیکي

۲ برارون عزیز، خودون شمو خبر درید که آمدون ازمو د پیش شمو بے فایده نبود. ^۲ شمو میدید که مو د شار فیلیپی رنج دیدی و چپس مردم قد ازمو بدرفتاری کد. لیکن باوجود امزی مخالفت های سخت، خدا دز مو جرأت دد تا که خوشخبری خدا ره دز شمو برسندی. ^۳ نصیحت-و-تشویق ازمو نه از گمراهی بود و نه د نیت ناپاک و نه ام د فریب دز شمو رسید. ^۴ بر عکس، خدا از مو راضی شد و اعلان کدون خوشخبری ره د عهده ازمو ایشنت. و مو د ای مقصد خوشخبری ره اعلان نکدی که مردم از مو راضی شنه، بلکه مو رضایت خدا ره میخاهی، چون خدا از

تمام نیتِ دل های مو خبر دَره. ^۵ شُمو میبندید که مو هیچ وخت کوشش نکدی که قد زبون لَخْشُم شُمو ره جَلَب کنی و نه ام از خاطرِ کُدم منافعِ شخصی دَ دیر شُمو آمدی؛ خُدا دَزی باره شاهدِ آسته. ^۶ مو از مردُم احترام-و-بُزرگی نخواستی، نه از خود شُمو و نه از کسِ دیگه، اگرچه بحیثِ رسولای مسیح مو امی حقِ بزرگی ره دَ بله شُمو دشتی. ^۷ لیکن مو قد شُمو دَ نرمی-و-مُلایمت رفتار کدی، مثلِ یگ آبه مهربو که از نلغه گون خُو آبیله مونه. ^۸ مُحَبَّت-و-علاقه ازمو دَ باره شُمو تا امرو حد بود که نه تنها پیغامِ خُدا ره دَز شُمو اعلان کدی، بلکه حتی زندگی خُو ره ام دَ اختیار شُمو ایشتی، چراکه شُمو اموقس دَز مو عزیز بودید. ^۹ برارو، مُشَقَّت و سختی های ره که مو دیدی حتماً از یاد شُمو نرفته بشه: شاو و روز مو زحمت کشیده بلده تهیه معاش خُو کار موکدی تاکه از خاطرِ رَسندون پیغامِ خُدا سربارِ یگون شُمو نشنی. ^{۱۰} و شُمو، آی ایماندارا، شاهدِ آستید که دَ چی پاکی و دَ چی عدالت و خلوص نیت قد شُمو رفتار موکدی و خُدا خود شی ام دَزی باره شاهدِ آسته. ^{۱۱} امچنان شُمو میبندید که مو قد هر کُدم از شُمو امو رقم رفتار موکدی، که یگ آته قد بچکیچای خُو رفتار مونه: ^{۱۲} مو شُمو ره نصیحت موکدی، دلداری میددی و شُمو ره شله موشدی تاکه رفتار شُمو قابلِ قبولِ خُدا بشه، چُون او شُمو ره دَ پادشاهی و جلالِ خُو دعوت مونه.

^{۱۳} و ازی دلیل ام مو دایم خُدا ره شُکر مونی، چُون وختیکه پیغامِ خُدا ره دَز شُمو اعلان کدی، شُمو که او ره از دان ازمو شنیدید، او ره توره انسانی فکر نکدید، بلکه او ره دَ عنوانِ کلامِ خُدا قبول کدید که واقعا کلامِ ازو ام آسته و دَ زندگی شُمو که ایماندار آستید کار مونه. ^{۱۴} آی برارو، شُمو از جماعت های ایماندارای خُدا که دَ مُلکِ یهودیه آسته، تقلید کُننده شدید، یعنی امو رنج-و-سختی های که اونا از خاطرِ ایمان خُو دَ عیسی مسیح از وطندارای یهودی خُو دید، شُمو ام از دستِ وطندارای خودون خُو دیدید. ^{۱۵} مولا عیسی و انبیا ره یهودیا کُشت و آلی اونا مو ره ام آزار-و-اذیت مونه. خُدا ازوا خوش نیبه و اونا مخالفِ پگِ مردُم آسته ^{۱۶} و کوشش مونه مو ره از رَسندون پیغامِ خُدا که باعثِ نجاتِ مردُم غیرِ یهود موشه، منع کنه. دَزی رقم بارِ گناه های ازوا گرنگتر شده موره و دَ آخرِ غَضَبِ خُدا دَ بله ازوا نازل موشه.

^{۱۷} برارون عزیز، بعد ازو که یگ مدت ره از شُمو دور شدی، اگرچه دل مو از شُمو دور نبود، مو دُوچند زیادتَر دَ ای آرزو بودی و کلو کوشش موکدی که روی شُمو ره بسم بنگری. ^{۱۸} مو میخواستی که دَ پیش شُمو بییی و مخصوصاً خود مه، پولس، بارها کوشش کُدم که دَ دیر شُمو بییم، لیکن شیطو مو ره نه ایشتی. ^{۱۹} امید و خوشی و تاجِ افتخارِ ازمو چی آسته؟ آیا شُمو نیستید که دَ وختِ ظُهورِ مولا عیسی دَ حُضُورِ ازو باعثِ سربلندی ازمو موشید؟ ^{۲۰} آره، شُمو افتخارات و خوشی ازمو آستید.

۳^۱ آخِرْكَارَ كِه دِيگِه تَحْمَلِ تَنْبَسْتِي اَز شُمُو بے خَبَرِ بَشِي، اوخْتِه تَصْمِيمِ گِرْفَتِي كِه مَو تَنْهَایِ خُو دَ شَارِ اَتِنِ بَمْنِي
 ۲ و تِيْمَوْتَاوَس رِه دَ دِيرِ اَز شُمُو رِي كَدِي. اُو يِگِ بَرَارِ اِيْمَانْدَارِ و يِگِ هَمْكَارِ اَز مَو دَ رَاهِ خُدا و دَ پَخَشِ كَدُونِ
 خَوْشخَبَرِي مَسِيحِ اَسْتِه. اُو رِه دَ پِيَشِ شُمُو رِي كَدِي تَاكِه اُو شُمُو رِه دَ اِيْمَانِ تَشْوِيْقِ كَنِه و دَزِ شُمُو دِلْدَارِي بَدِيه^۳ تَا
 هِيچِ كُدْمِ شُمُو دَ اَثَرِ اَمَزِي رَنجِ هَا-و-زَحْمَتِ هَا دِلْسَرْدِ نَشْنِيدِ، چُونِ شُمُو خُوبِ خَبَرِ دَرِيدِ كِه مَو بَلْدِه اَمَزِي مَقْصَدِ
 مَقْرَرِ شُدِي كِه رَنجِ-و-زَحْمَتِ بَنَگَرِي. ^۴ رَاسْتِي، زَمَانِيكِه مَو قَدِ شُمُو بُوْدِي، پِيَشِ اَز پِيَشِ دَزِ شُمُو گُفْتُدِي كِه رَنجِ-و-
 آزارِ دَ اِنْتِظَارِ شُمُو اَسْتِه؛ و شُمُو مِيْدَنِيْدِ كِه وَاقِعاً اَمِي رَقْمِ شُدِ. ^۵ اَمَزِي خَاطِرِ و خْتِيكِه طَاقَتِ اَزِي رِه نَدَشْتَمُ كِه دِيرْتَرِ
 اَز شُمُو بے خَبَرِ بَشَمُ، اوخْتِه يِگُو كَسِ رِه دَ پِيَشِ شُمُو رِي كُدْمِ تَاكِه اُو اَز اُسْتَوَارِي اِيْمَانِ شُمُو اِطْمِيْنَانِ حَاصِلِ كَنِه.
 مَا تَرَسِ خَوْرُدُم كِه شَبِيطُو شُمُو رِه وَسَوَسِه كَدِه بَشِه و تَمَامِ زَحْمَتَايِ مَو اَز بِيْنِ رَفْتِه بَشِه.

خبرِ خوش و دلگرم كُننده تيموتائوس

۶^۱ لِيكِنِ اَلِي تِيْمَوْتَاوَس اَز پِيَشِ شُمُو پَسِ دَ دِيرِ اَز مَو اَمْدِه و دَ بَارِه اِيْمَانِ و مَحَبَّتِ شُمُو دَزِ مَو خَبَرِ خَوْشِ اُورْدِه كِه
 شُمُو هَرِ غَيْبِ مَو رِه يَادِ مُونِيْدِ و دَ شَوْقِ دِيْدَارِ مَو اَسْتِيْدِ، دَمْرُو اَنْدَازِه كِه مَو اَمِ دَ آرزُوِي دِيْدَارِ اَز شُمُو اَسْتِي. ^۷ پَسِ
 اِي بَرَارِو، باوْجُوْدِ اَزِي كِه مَو دُچارِ پَرِيشَانِي و مُصِيبَتِ اَسْتِي، لِيكِنِ اَز شَنِيدُو دَ بَارِه اِيْمَانِ شُمُو تَسَلِّي پِيْدَا كَدِي و
 اَسُوْدِه شُدِي. ^۸ و اَلِي كِه شُمُو دَ خُداوندِ اُسْتَوَارِ اَسْتِيْدِ، زَنْدِگِي اَز مَو تَازِه مَوْشِه. ^۹ نَمُوْفَاْمُ، قَدِ چِيْزِ خِيْلِ مَو مِيْتِنِي اَز
 خُدا شُكْرْگُزَارِي كَنِي بَخَاطِرِ پَگِ اَمَزِي خَوْشِي كِه دَ بَارِه اَز شُمُو دَ پِيَشِگَاهِ خُدا اِحْسَاسِ مُونِي. ^{۱۰} لِيكِنِ شَاوِ و رُوْزِ دَ
 شَوْقِ كَلُو دُعا مُونِي و اَز خُدا طَلِبْگَارِ اَسْتِي كِه بَسْمِ رُوِي شُمُو رِه بَنَگَرِي و هَرِ رَقْمِ كَمْبُوْدِي اِيْمَانِ شُمُو رِه پُورِه
 كَنِي.

۱۱^۱ مَو دُعا مُونِي كِه اَتِه مَو خُدا خُوْدِ شِي و مَوْلَايِ مَو عِيْسِي، رَاهِ رِه بَسْمِ بَلْدِه اَز مَو وَازِ كُنِه تَا دَ دِيرِ شُمُو بِيِي ^{۱۲} و
 دُعا مُونِي كِه مَوْلَا مِهْرِ-و-مَحَبَّتِ شُمُو رِه بَلْدِه يِگْدِيگِه شُمُو و بَلْدِه پَگِ مَرْدُمِ كَلُو كَنِه، اَمُو رَقْمِ كِه مَحَبَّتِ اَز مَو بَلْدِه
 شُمُو كَلُو اَسْتِه. ^{۱۳} اُو دَ وِسْبِيْلِه مِهْرِ-و-مَحَبَّتِ دِلِ هَايِ شُمُو رِه قَوِي كَنِه تَا دَ اَمْرُو رُوْزِ كِه مَوْلَايِ مَو عِيْسِي قَدِ
 مَقْدَسِيْنِ خُو دُوْبَارِه ظَهْوَرِ مُونِه، شُمُو دَ نَظَرِ اَتِه مَو خُدا پَاكِ و بے عَيْبِ بَشِيْدِ.

زندگی مطابقِ خاستِ خُدا

۱۴^۱ دَ آخِرِ، اِي بَرَارِو، شُمُو اَز مَو يَادِ گِرْفَتِيْدِ كِه چَطُوْرِ بَايْدِ رَفْتَارِ كُنِيْدِ تَاكِه خُدا اَز شُمُو خَوْشَنُوْدِ بَشِه و شُمُو اَمُو

رقم ام زندگی مونیډ. آلی مو د نام مولا عیسیٰ د پیش شمو زاری مونی و دز شمو تاکید مونی که ازی کده ام کلوتر کوشش کنیډ. ^۲ چون امو احکام ره که مو از طرف مولا عیسیٰ دز شمو ددی، پگ شمو موفامیډ. ^۳ خاست-و-اراده خدا مُقَدَّس شدون شمو آسته، یعنی از هر رقم فسادِ اخلاقی و زناکاری خود ره دُور نگاه کنیډ. ^۴ هر کدم شمو باید بُفامیډ که جسم خُو ره چی رقم اداره کنیډ و او ره د پاکي و عزت نگاه کنیډ ^۵ و رقم مردم خدا ناشناس آلی بنده شهوت و هوس ها نبشید. ^۶ هیچ کس نباید د حق یگ برار خُو تجاوز کنه و نه ام دزی باره کس ره بازی بیده، چراکه خداوند از پگ امزی کارا انتقام میگیره. ای تورا ره مو از گاه دز شمو گفتدی و تاکید کددی. ^۷ خدا مو ره بلده ازی انتخاب نکرده که مو د ناپاکی زندگی کنی، بلکه برای ازی که پاک و مُقَدَّس بشی. ^۸ پس کسی که امی نصیحت ره رد مونه، او شخص نه انسان ره، بلکه خدای ره انکار مونه که روح القدس خُو ره دز شمو میدیه.

^۹ د باره مُحَبَّت د بین برارو لازم نیسته که دز شمو یگو چیز نوشته کنم، چون خودون شمو از خدا یاد گرفتید که چی رقم باید قد یگدیځه خُو مُحَبَّت دشته بشید. ^{۱۰} شک نییه که شمو د تمام ولایت مقدونیه قد پگ برارو امی رقم رفتار مونیډ. ولے باز ام، آی برارو، از شمو خواهش مونم که مُحَبَّت شمو ازی کده ام کلوتر شنه ^{۱۱} و هدف شمو اینمی بشه که یگ زندگی آرام دشته بشید. د کارای خودون خُو مشغول بشید و قد دستای خُو زحمت کشیده خرچ های زندگی خُو ره پیدا کنیډ، امو رقم که ازی پیش دز شمو امر کددی، ^{۱۲} تاکه شمو د نظر غیر مسیحی ها اعتماد پیدا کنیډ و د هیچ چیز محتاج نبشید.

ظهور مسیح

^{۱۳} برارو، ما میخایم که شمو از وضعیت ایماندارای که فوت کده، با خبر بشید تا شمو مثل کسای که امید زندگی ابدی ندره، غم و کوئبو نکنیډ. ^{۱۴} چون مو ایمان دری که عیسیٰ مُرد و بعد از مرگ دوباره زنده شد و ام یقین دری که د وخت پس آمدون ازو، خدا تمام ایماندارا ره که مُرده، قد مسیح قتی پس میره. ^{۱۵} و اینمی توره ره مو از کلام مولا موگی: یعنی مو که زنده آستی و تا روز ظهور مولا باقی مومنی از مُرده ها کده پیشتر د حضور ازو نمیرسی. ^{۱۶} چون مولا خود شی د آواز بلند و د صدای ملایکه اعظم و د صوت شیپور از آسمو نازل موشه و اول کسای که د مسیح ایمان دشت و فوت کدد، اونا دوباره زنده موشه. ^{۱۷} بعد ازو، مو که تا هنوز زنده آستی قد ازوا قتی سون آور ها و طرف عالم باله برده موشی و قد مولا یگ جای شده تا ابد قد ازو مومنی. ^{۱۸} پس قد امزی توره ها یگدیځه خُو ره تشویق کنیډ و دلداری بیدید.

تباری بلده ظهور مسیح

۵ برارون عزیز، د باره وخت و زمان امزی واقعه ها لازم نییه که یگو چیز بلده شمو نوشته کتم، ^۲ چون شمو خوب میدنید که روز خداوند رقم دزی آسته که د غیت شاو مییه. ^۳ د امزو وخت که مردم موگه: "صلح و امنیت آسته،" بے بلغه مصیبت، خرابی و ویرانی دامونگیر مردم موشه مثل که درد زیدو د سراغ خاتون شکامتو مییه و هیچ راه بلده دوتا کدو نییه. ^۴ لیکن شمو، آی برارو، د تریکی نیستید که او روز شمو ره رقم یگ دز غافلگیر کنه، ^۵ چون شمو بچکیچای نور و روز آستید. مو نه د تریکی کار دری و نه د شاو. ^۶ پس، بیید که رقم دیگر وری خاورده نبشی، بلکه بیدار و آدر بشی. ^۷ چون کسای که خاو مونه، اونا شاو د خاو موره و کسای که خود ره نشه مونه اونا ام از طرف شاو نشه مونه. ^۸ و له مو که د روشنی روز تعلق دری، باید آدر بشی و ایمان و محبت خو ره مثل زره وری د جان خو کنی و امید نجات ره رقم کوله آینی وری د سر خو کنی. ^۹ چون خدا مو ره بلده ازی انتخاب نکرده تا د غضب ازو گرفتار شنی، بلکه برای ازی که د وسیله مولای مو عیسی مسیح نجات پیدا کنی. ^{۱۰} او جان خو ره بلده از مو فدا کد تا که مو د وخت ظهور شی قد ازو وقتی زندگی کنی، چی بیدار بشی، چی خاو. ^{۱۱} پس دزی ترتیب د تشویق و تقویه یگدیگه خو ادامه بدید، امو رقم که آلی ام موکنید.

نصیحت های آخری

^{۱۲} آکو برارو، مو از شمو خاهش مونی تا امو کسای ره که د بین شمو د نام مولا عیسی زحمت میکشه و شمو ره د راه مولا نصیحت و راهنمایی مونه، د عنوان پیشوایون خو شتخته دزوا احترام کنید ^{۱۳} و اونا ره از خاطر امزو زحمت ها قد جان و دل خو محبت و عزت کنید و قد یگدیگه خو د صلح-و-صفا زندگی کنید. ^{۱۴} برارو، مو از شمو خاهش مونی که آدمای ثمبل و جوربغل ره سرزنش کنید، افراد کم دل و ترسندک ره دلداری بدید، از نفرای ضعیف و کم وس پشتیبوانی کنید و قد پگ مردم صبر-و-حوصله کنید. ^{۱۵} هوش کنید که د عوض بدی، بدی نکنید، بلکه همیشه کوشش کنید که قد یگدیگه خو و ام قد تمام مردم دیگه خوبی کنید. ^{۱۶} هر غیت خوش بشید. ^{۱۷} همیشه دعا کنید. ^{۱۸} د هر حالت که آستید، از خدا شکرگزاری کنید، چرا که اینمی خاست-و-اراده خدا بلده شمو د راه عیسی مسیح آسته. ^{۱۹} آتش روح القدس ره گل نکنید. ^{۲۰} پیشگوی ها ره سبک-و-اندک فکر نکنید، ^{۲۱} مگم د باره تمام چیزا تحقیق کنید و هر چیزی خوب ره محکم بگیرید. ^{۲۲} خودون خو ره از هر رقم بدی دور نگاه کنید.

^{۲۳} خدای که سرچشمه صلح-و-سلامتی آسته، خود شی شمو ره کاملاً پاک-و-مقدس کنه تا که روح و جان و جسم

شُمو تا روزِ ظُهورِ مَولایِ مو عیسیٰ مسیح، بے عیب و سالم بُمَنه. ^{۲۴} اُمُو که شُمو ره دعوتِ دَده قابلِ اعتماد و باوفا آسته و حتماً امی کارا ره پوره مونه.

^{۲۵} برارو، دَ حقِ ازمو دُعا کُنید. ^{۲۶} پگ برارو ره از دِلِ پاکِ قد رُویِ ماخی سلام بُگید. ^{۲۷} ما دَ نامِ مَولا شُمو ره قَسَمِ میڈم که امی خط ره دَ تمامِ برارو بخانید.

^{۲۸} فِیضِ مَولایِ مو عیسیٰ مسیحِ نَصیبِ پگِ شُمو شُنه. آمین.